



ATASSUT

UPA14/189

Knud Kristiansen

22.05.2014

Isorliunerusuni nunaqarfinni nioqqutissatigut, kiffartuussinermi akitigut, aammalu pilersorneqarnikkut akitigut, qanoq oqinnerusumik naapertuunnerusumillu ineriartortitsisoqarsinnaanera pillugu Inatsisartut oqallinnissannik siunnersuut.

(Inatsisartunut ilaasortat Knud Kristiansen og Gerhardt Petersen)

ATASSUT-mi isorliunerusut pillugit politikkitsinni pingaartilluinnarparput isorliunerusut ineriartortitsinermi tamatigut naapertuuttumik pissutsit aallaavigalugit akisussaasut suleqatigiinnermikkut ingerlatissagaat.

Nunatta immikkuullarissutsimikkut ilisarnaataasa ilagilluarpaat siamasissumik nunatta aaqqissuussaanera, tamannalu aallaavigalugu inooriaaseqarnerput, sumiiffiit, ileqqutta, inooriaatsittalu assigiinngisitaarnerat, tamannalu inuiaqatigiittut nukittussutsimik ersiutigigipput ATASSUT-mi isumaqarpugut.

Tamanna aamma ulluinnarni assigiinngitsorpassuartigut unammillernartunik atugassaqartitsivoq. Isorliunerusuni inuuneq, amerlasuutigut inuttut inooqatigiinnermullu tunngatillugu pilluarnartusoq, aamma atugassarititat ilaasigut unammillernarmat, ilaatigut angallannikkut, ilinniartitaaneq, meeqqat atuarfiini atuartitaanikkut, meeqquveqarnikkut, taamatullu pisortat sullissiviinit kiffartuunneqarnikkut, aammalu pilersuineq, assartuinerlu eqqarsaatigalugit.

ATASSUT-miit pisariaqartutut isigaarput, pissutsit aallaavigalugit ineriartortitsineq piusariaqarmat, sumiiffinni akisussaasut aammalu sumiiffinni innuttaasut peqatigalugit aaqqissuussineq tunngaveqassammat.

Meeqquveqarneq eqqarsaatigalugu nunaqarfippassuarni, illoqarfinnilu mikinerusuni annertuumik suli amigaataapput. Angajoqqaarpasuit tamatigut suliffimminnik noqinnissinnaaneq ajorput, meeqqamik ullukut sulinerminni paarineqarsinnaanerat annertuumik periarfissaqarneq ajormat.



Meeqqat atuarfiini ilaatigut “Atuarfitsialak” suli angummaffigineqanngilaq. Atuarfiit ilusilersorneqarnerat, angissusaat, init aaqqissuunneqarnerat, ilaatigullu atuarfiit piusut qanganitserpallaarsimagamik naapertukkunnaavissimasut pissutigalugit, siunertap naammassillugu angummaffiginiarnera ajornartorsiutaasarmat, naak qujanaqisumik sumiiffinni ilinniartitsisut pisinnaasartik tamaat pitsaanerpaamik tunniussa qaraluartut.

Ilinniartitaaneq qiviassagutsigu, nunaqarfippassuarni, illoqarfinnilu isorliunerusuniittuni annertuumik iliuuseqarluni suleqatigiiffissaavoq. Piareersarfiit amigaataasimasut nalunangilaq. Pisariaqartitsineq suli annertoqaaq. Taamaattumillu anguniagassaavoq, nunaqarfinni qitiusuni piareersarfiit immikkoortortaqalersinnaanerat pimoorullugu sulissutigisariaqartoq ATASSUT-miit isumaqarpugut. Soorunami atuarfittaa, ineqarfissaq (kolligie) avatangiisillu allat pisariaqartinneqartut pilersinneqassapput. Taamaasiornikkut nunaqarfinni isorliunerusunilu piviusumik ajornartorsiut toqqaannartumik tassuunakkut iliuuseqarfignissavarput. Aamma ilinniartitsisut ilinniarsimasut nunaqarfimminnut imaluunniit illoqarfimminni atorfinnissaminnut periarfissaqalissapput, immaqalu ukiorpassuarni nunaqarfik illoqarfilluunniit inunngorfitsik kiffartorfignissallugu. Taamaasiornikkut inuusuttut uniinnartoortartut ingerlaannarnissaannik periarfissarsiuunneqassapput, nunaqarfinni illoqarfinnilu mikinerusuni aamma ilinniartitaanikkut aaqqissuussiffigineri iliuuseqarfignissapput, suliffiit ataavartut pilersinneqassapput aamma tassuunakkut.

ATASSUT-miit pisariaqarluinnartutut isigaarput, sanaartugassatigut pilersaarutit, pisortallu kiffartuussinerinut tamanut tunngatillugit pilersaarutinik ataqatigiissitsineq, Namminersorlutik Oqartussat aamma Kommuunit peqatigiilluinnarlutik ingerlattariaqaraat. Isumaqarpugut, aatsaat taamatut suleriuseqarnermi piviusorsioortumik nunaqarfiit pillugit isorliunerusunilu illoqarfiit ineriartortinneqarnerat ataqatigiissumik ingerlanneqarsinnaasoq.

Nunaqarfinni suliffissat pilersinniarnierini pingaaruteqarpoq, aamma kiffartuussinikkut isumaqatigiissutit qimerluussallugit. Soorunami suliffeqarfinnut kiffartuussisunut isumaqatigiissutit pitsaasuusinnaapput, atueqatigiinnikkut kiffartuussinerit ingerlanneqarneri. Illua-tungaatigullu suliffissaqartitsineq eqqarsaatigalugu tamatigut naapertuunnersoq isummorsorfigineqarsinnaasoq ATASSUT-miit isumaqarpugut.



ATASSUT INATSIARTUNI

ATASSUT-miit pisariaqarluinnartutut isigaarput, suliniuteqarnissani akisussaaffiit soorunami ataqqillugit, inatsisitigut pisussaaffiit, soorlu kommuunit akisussaaffii, Namminersorlutik Oqartussat akisussaaffii, taamaattorli ataatsimut kivitseqatigiilluni isorliunerusuni nunaqarfiit illoqarfiillu pillugit ineriartortitsinissamik suleqatigiilluinnartoqartariaqartoq.

Suliffinnik nutaanik pilersitsinissamik isumaliuteqarnermi pinngitsoorneqarsinnaangilaq, ataqatigiissumik isiginnilluni periuseqarnissaq. Takornariaqarneq eqqarsaatigalugu nunaqarfinni ineriartortitsinissami innuttaasut peqatigilluinnarluit sulisoqartariaqartoq ATASSUT-mi pingaartilluinnarparput, takonarialerinnermut pikkorissaanerit, pisariaqartitanullu inerisaanerit peqatigitillugit, aamma tassunga atatillugu pinngitsoorneqarsinnaangilaq angallanneq qiviassallugu.

Angallannikkut aaqqissuussineq piffissami tullermi annertuumik isumaliutigisariaqarpoq, ataqatigiissumik ilusilersorneqarsinnaanera anguniarlugu.

Isorliunerusuni nunaqarfinni illoqarfinnilu inuusuttut ilinniareerlutik utertarnissaat pimoorullugu anguniarutsigu, iliuuseqartariaqarpugut, piginnaangorsarfiit immikkoortuinik sanaartornikkut pilersitsinikkullu. Meeqqeriviit, meeraaqqeriviit, atuarfiit naleqqusarlugit, utoqqaat illuinik, najugaqatigiiffiinillu sanaartornikkut, taamaasiorluta meeqqerisut, ilinniartitsisut, isumaginninnermi sulisut, ikiortit ilinniarsimasut nunaqarfimminnut, illoqarfimminnut uterlutik atorfinissinnaanerat qulakkiissavarput, ukiorpassuarnilu aalajaatsunik sullissisoqartillugit.

Naggataatigut ATASSUT-miit oqaatigissavarput, aalisarnikkut suli isorliunerusut annertuumik ukiorpassuarni inuussutissarsiuteqartussaasut qularnangimmat. Pisariaqarpoq sumiiffinni tunitsiveqarnikkut pissutsit qanimut oqartussaasut, Nunaqarfinni Siulersuisut, Kommuunit piginneqatigiillutillu ingerlatsisut peqatigalugit ineriartortitseqqinneq suliassaammat. Taamatut oqaaseqarluta oqallinnermut qujavugut.